

**BOSNA I HERCEGOVINA
FEDERACIJA BOSNE I HERCEGOVINE
VLADA**

NACRT

**ZAKON
O IZMJENAMA I DOPUNAMA ZAKONA O MJERITELJSTVU
U FEDERACIJI BOSNE I HERCEGOVINE**

Sarajevo, decembar 2013. godine

**ZAKON
O IZMJENAMA I DOPUNAMA ZAKONA O MJERITELJSTVU
U FEDERACIJI BOSNE I HERCEGOVINE**

Član 1.

U Zakonu o mjeriteljstvu u Federaciji Bosne i Hercegovine („Službene novine Federacije BiH“, broj 8/05), u članu 4., u tački g), riječi: „ili proceduru jednako vrijednu proceduri akreditacije“, brišu se.

U tački o), iza riječi: „certifikat o verifikaciji“, dodaju se riječi: „(uvjerenje o udovoljavanju mjeriteljskim zahtjevima)“.

Iza tačke u) dodaje se nova tačka v), koja glasi:

„v) „ovlašteni servis za pripremu mjerila za verifikaciju“ (u daljem tekstu: ovlašteni servis) je fizičko ili pravno lice ovlašteno od strane federalnog ministra energije, rudarstva i industrije (u daljem tekstu: federalni ministar), koje pregledava, popravlja i ispituje mjerila ili mjerne sisteme iz zakonskog mjeriteljstva radi pripreme za verifikaciju.“

Član 2.

U članu 5., riječ „standarde“ i riječi: „i intelektualno vlasništvo“, brišu se.

Član 3.

Član 6., mijenja se i glasi:

„Iz oblasti mjeriteljstva u Federaciji, Zavod donosi: tehničke propise o verifikaciji mjerila; tehničke i mjeriteljske propise za davanje ovlaštenja servisima za pripremu mjerila za verifikaciju; propisuje tehničke uvjete (prostorija, etaloni, radni uvjeti, ostali tehnički uređaji za ispitivanje i kalibraciju mjerila, kao i stručnu spremu zaposlenika) koje moraju da ispunjavaju ovlašteni servisi; vrši ispitivanje i verifikaciju mjerila; izdaje potvrde o ispunjenju mjeriteljskih i drugih uvjeta za uvoz mjerila, certifikate o ispravnosti mjerila (certifikat o verifikaciji, kalibraciji) i druge isprave iz svoje nadležnosti; učestvuje u ostvarivanju, čuvanju, održavanju i upotrebi etalona i referentnih materijala; vodi odgovarajuće registre na području Federacije; vrši mjeriteljski nadzor nad upotrebom i verifikacijom mjerila; nadzor nad količinama i označavanjem pretpakiranih proizvoda; vrši neposrednu kontrolu predmeta od plemenitih metala i otiskivanje žiga na njih; predlaže članove sa područja Federacije koji će biti delegirani u Savjet i druga radna tijela Instituta; saraduje sa odgovarajućim institucijama u Bosni i Hercegovini i obavlja sve druge poslove iz oblasti mjeriteljstva koji nisu u nadležnosti Instituta, a regulisani su posebnim zakonima i propisima.

Za obavljanje poslova verifikacije i nadzora nad mjerilima, nadzora pretpakiranih proizvoda, neposredne kontrole predmeta od plemenitih metala i nadzora nad provođenjem zakonskih mjeriteljskih propisa u Federaciji, Zavod formira centre za verifikaciju i nadzor mjerila (u daljem tekstu: centri) čiji se broj i organizaciona struktura utvrđuje Pravilnikom o unutrašnjoj organizaciji Federalnog ministarstva energije, rudarstva i industrije.

Federalni ministar na prijedlog direktora Zavoda može ovlastiti fizičko ili pravno lice (ovlašteni servis) za pregled i pripremanje određene vrste mjerila iz zakonskog mjeriteljstva za verifikaciju, ako ispunjavaju propisane mjeriteljske i tehničke zahtjeve.

Federalni ministar na prijedlog direktora Zavoda može ukinuti ovlaštenje servisu ako više ne udovoljava propisanim tehničkim i mjeriteljskim zahtjevima i ako ne provodi odredbe ovog Zakona i propisa donesenih za njegovu provedbu.

Zavod vodi registar i vrši nadzor nad radom ovlaštenih servisa.“

Član 4.

U članu 7., u stavu 2., riječi: „kalibriše i verifikuje Institut u skladu sa međunarodnim mjeriteljskim preporukama i dokumentima“, zamjenjuju se riječima: „i ovlašteni servisi moraju biti kalibrisani i verifikovani.“

Član 5.

U članu 8., u stavu 1., riječi: „na način i prema metodama koje propisuje direktor Instituta u formi mjeriteljskih uputstava“, zamjenjuju se riječima: „i kalibracione laboratorije koje su akreditirane po standardu ISO 17025 od nadležne državne institucije za akreditaciju.“

Član 6.

U članu 9. stav 4., mijenja se i glasi:

„Mjerila koja se koriste u zakonskom mjeriteljstvu moraju biti označena:

- a) propisanim žigom verifikacije
- b) oznakom certifikata o usklađenosti ili oznakom certifikata o odobrenju tipa.“

Član 7.

U članu 12., iza stava 1. dodaje se novi stav 2., koji glasi:

„Mjerila koja se uvoze i za koja nije obavezan mjeriteljski nadzor moraju imati odobrenje za uvoz mjerila doneseno od Zavoda.“

Dosadašnji st. 2. do 5. postaju st. 3. do 6.

Član 8.

U članu 13., stav 2. mijenja se i glasi:

„Verifikaciju mjerila, u skladu sa važećim tehničkim propisima, vrše centri Zavoda, ovlašteni servisi i imenovana pravna lica koja su prethodno prošla proceduru akreditiranja uz mjeriteljski nadzor Zavoda.“

U stavu 3., iza riječi: „verifikacije mjerila“, dodaje se zarez i riječi: „tehničke i mjeriteljske propise za davanje ovlaštenja servisima za pripremu određene vrste mjerila za verifikaciju“.

Član 9.

U članu 15., iza stava 3. dodaje se novi stav 4., koji glasi:

„Zahtjev za narednu verifikaciju u ime vlasnika ili korisnika mjerila može podnijeti i ovlašteni servis ili imenovana laboratorija.“

Dosadašnji st. 4. i 5. postaju st. 5. i 6.

Član 10.

U članu 17. stav 1., mijenja se i glasi:

„Vrste i oblike žigova i isprava koje se upotrebljavaju za verifikaciju mjerila na području Federacije propisuje federalni ministar na prijedlog direktora Zavoda.“

U stavu 3. iza riječi „mjerila“, dodaju se riječi: „(uvjerenje o udovoljavanju mjeriteljskim zahtjevima)“.

Član 11.

U članu 21., u stavu 1., iza riječi „inspekcija“, briše se zarez, a riječi: „odnosno pravno lice koje je imenovano od Instituta“ zamjenjuju se riječima: „u okviru svojih ovlaštenja“.

Član 12.

Član 23., mijenja se i glasi:

„Nadzor nad provedbom ovog Zakona i podzakonskih akata donesenih za njegovu provedbu vrši Zavod.“

Član 13.

U članu 24., iza stava 2. dodaje se novi stav 3., koji glasi:

„Nadzor nad ovlaštenim servisima za pripremu mjerila oko ispunjenja tehničkih uvjeta vrši Zavod.“

Član 14.

U članu 26., u stavu 1., riječi: „Provedbu ovog Zakona pri nadzoru“, zamjenjuju se riječima: „Inspekcijski nadzor“.

Član 15.

U članu 27., u stavu 1., iza riječi „za“, dodaje se riječ „mjeriteljski“, a iza riječi „nadzor“ dodaju se riječi: „i nadzor nad provedbom zakonskih mjeriteljskih propisa u Federaciji“.

Član 16.

U članu 32., u stavu 1., broj „20.000,00“ zamjenjuje se brojem „15.000,00“.

U stavu 2., broj „120,00“ zamjenjuje se brojem „500,00“, a broj „1.200,00“ zamjenjuje se brojem „3.000,00“.

Član 17.

U članu 33., u stavu 1., broj „600,00“ zamjenjuje se brojem „500,00“, a broj „2.000,00“ zamjenjuje se brojem „3.000,00“.

Iza tačke c), dodaju se nove tač. d) i e), koje glase:

„d) stavi u promet mjerilo, a da nije ispunio obaveze koje su mu naložene prilikom izdavanja potvrde o uvozu mjerila (obaveze uvoznika/imaoca mjerila da ispita tip i/ili verifikuje mjerilo) (član 9. stav 4. tačka b);

e) stavi u promet mjerilo, a da nije ispunio obaveze koje su mu naložene prilikom izdavanja odobrenja za uvoz mjerila (obaveze uvoznika/imaoca mjerila da označi mjerilo odgovarajućom naljepnicom „naučna istraživanja“ ili „obrazovni proces“ ili „lična upotreba“ ili „propagandni materijal“) (član 12. stav 2.).“

U stavu 2., broj „500,00“ zamjenjuje se brojem „1.000,00“.

Član 18.

U članu 34., u stavu 1., broj „250,00“ zamjenjuje se brojem „500,00“, a broj „600,00“ zamjenjuje se brojem „3.000,00“.

U stavu 2., broj „50,00“ zamjenjuje se brojem „100,00“, a broj „100,00“ zamjenjuje se brojem „500,00“.

Član 19.

Ovaj Zakon stupa na snagu narednog dana od dana objavljivanja u „Službenim novinama Federacije BiH“.

OBRAZLOŽENJE

NACRTA ZAKONA O IZMJENAMA I DOPUNAMA ZAKONA O MJERITELJSTVU U FEDERACIJI BOSNE I HERCEGOVINE

I - USTAVNI OSNOV

Ustavni osnov za donošenje ovog zakona sadržan je u odredbama člana III. 1. tačka b) koji je izmjenjen amandmanima VIII, LXXXIX i CVI na Ustav Federacije Bosne i Hercegovine, prema kojoj je u isključivoj nadležnosti Federacije Bosne i Hercegovine utvrđivanje ekonomske politike, uključujući planiranje i obnovu, te politiku korištenja zemljišta na federalnom nivou.

II - RAZLOZI ZA DONOŠENJE ZAKONA

Izmjene i dopune Zakona o mjeriteljstvu u Federaciji Bosne i Hercegovine (u daljem tekstu: Zakon) bile su neophodne iz više razloga:

- prevazilaženje u praksi prisutne problematike dosljedne provodivosti Zakona i podzakonskih akata sa aspekta pravilnog razumijevanja njihovih odredbi i međuzavisnosti sa drugim aktima iz oblasti mjeriteljstva.
- približavanje zakonodavstvu EU u pogledu usaglašenosti sa tehničkim propisima i evropskim postupcima normizacije, mjeriteljstva, akreditacije i ocjenjivanja usklađenosti (navedeno u Izjavi o usklađenosti).
- usklađivanje sa reformom u oblasti prekršaja i
- nesmetan rad Zavoda u uvjetima neadekvatne opremljenosti (laboratorije, kadrovi i njihova obuka).

Donošenjem ovog zakona kojim se preciznije definiraju odnosi i nadležnosti njegovog provođenja, poboljšala bi se efikasnost u radu Zavoda u oblasti zakonskog mjeriteljstva.

III – OBRAZLOŽENJE POJEDINIH ODREDBI

Nacrtom zakona o izmjenama i dopunama Zakona o mjeriteljstvu u Federaciji Bosne i Hercegovine izvršene su izmjene i dopune u sljedećim članovima:

Član 1. - Za potrebe razumijevanja izmjena i dopuna odredbi ovog zakona uvode se novi izrazi sa odgovarajućim značenjem.

Član 2. – Izmjena i dopuna člana 5. Zakona, kojim se definira tačan naziv Instituta.

Član 3. - Regulišu se tehnički i mjeriteljski propisi i davanje ovlasti ovlaštenom servisu za pripremu mjerila za verifikaciju.

Član 4. i 5. – Precizira se način i metode kalibracije i verifikacije opreme koju posjeduje Zavod i ovlašteni servisi.

Član 6. - Predlaže se dopuna i izmjena člana 9. Zakona, gdje se propisuje kako moraju biti označena mjerila u zakonskom mjeriteljstvu.

Član 7. - Uvodi se nova isprava Zavoda, za uvoz mjerila za koja nije obavezan mjeriteljski nadzor, obzirom da carinski propisi nisu usklađeni sa mjeriteljskim.

Član 8. - Izmjene u članu 13. Zakona su izvršene zbog uvođenja ovlaštenog servisa u procesu verifikacije mjerila.

Član 9. – Izmjenom člana 15. Zakona propisuje se način podnošenja zahtjeva za verifikaciju mjerila od strane vlasnika ili korisnika mjerila, ovlaštenog servisa i imenovane laboratorije.

Član 10. - Predlaže se dopuna i izmjena člana 17. Zakona s obzirom da isti uzrokuje probleme (imenovanim laboratorijama, tržišnoj inspekciji i Zavodu) u vezi korištenja žigova i isprava na području Federacije.

Član 11. do 15. - Predlažu se dopune i izmjene u poglavljima VII. i VIII. Zakona, a odnose se na nadzor, gdje se u skladu sa propisima regulira nadležnost institucija u pogledu vršenja upravnog i inspeksijskog nadzora.

Član 16. do 18. – Izvršene su izmjene i dopune čl. 32.,33. i 34. Zakona, koje su usklađene sa propisima iz oblasti prekršaja.

IV – FINANSIJSKA SREDSTVA

Za realizaciju ovog Zakona nije potrebno osiguranje dodatnih sredstava iz Budžeta Federacije Bosne i Hercegovine.

**TEKST ČLANOVA ZAKONA O MJERITELJSTVU U FEDERACIJI BOSNE I
HERCEGOVINE U KOJIMA SE VRŠE IZMJENE I DOPUNE
(„Službene novine Federacije BiH“, broj 8/05)**

Član 4.

Izrazi upotrijebljeni u ovom Zakonu imaju sljedeće značenje:

- a) “zakonsko mjeriteljstvo” je oblast mjeriteljstva koja se bavi mjernim jedinicama, mjernim metodama i mjerilima sa stanovišta primjene obaveznih tehničkih i zakonskih zahtjeva u cilju ostvarivanja sigurnosti i tačnosti mjerenja;
- b) “mjeriteljski nadzor” je skup postupaka koji se provode u cilju održavanja ispravnosti mjerila i/ili referentnih materijala;
- c) “etalon” je mjera, mjerilo ili mjerni sistem namijenjen određivanju, pohranjivanju i reprodukciji neke mjerne jedinice radi prenošenja njene vrijednosti na druga mjerila da bi poslužila kao referentna vrijednost, a po mjestu u lancu sljedivosti, tačnosti i nesigurnosti mjerenja etaloni se rangiraju kao: međunarodni, državni, primarni, sekundarni i radni etaloni;
- d) “referentni materijal” je materijal ili supstanca čija je jedna ili više vrijednosti osobina dovoljno homogena i dobro definirana da se može koristiti za kalibraciju mjerila, za ocjenu mjerne metode i određivanje vrijednosti materijala;
- e) “certifikovani referentni materijal” je referentni materijal za koji postoji certifikat o vrijednostima osobine;
- f) “sljedivost” je osobina rezultata mjerenja ili vrijednosti etalona pomoću kojih se oni mogu dovesti u vezu sa navedenim referentnim, obično državnim ili međunarodnim etalonom neprekidnim lancem poređenja;
- g) “imenovana mjeriteljska laboratorija” je laboratorija koja je prethodno prošla proceduru akreditiranja u skladu sa ISO 17025 ili proceduru jednako vrijednu proceduri akreditacije i ispunjava zahtjeve iz Zakona o mjeriteljstvu Bosne i Hercegovine da može vršiti ispitivanja, kalibracije i verifikacije etalona, mjerila, referentnih materijala i opreme za verifikaciju;
- h) “odobrenje tipa” je dokument zasnovan na izvještaju o ocjenjivanju da tip mjerila zadovoljava propisane zakonske zahtjeve ili da je pogodno za upotrebu u propisanom prostoru na način kojim se očekuju pouzdani rezultati mjerenja tokom određenog vremenskog perioda;
- i) “ocjenjivanje usklađenosti” je svaka aktivnost koja se neposredno ili posredno odnosi na utvrđivanje da su odgovarajući zahtjevi zadovoljeni;
- j) “certifikat o usklađenosti” je dokument kojim se potvrđuje da pojedino mjerilo, partija mjerila ili proizvedena serija mjerila ispunjava sve propisane mjeriteljske zahtjeve za taj tip mjerila, a to se dokazuje pomoću postupaka ocjenjivanja usklađenosti u skladu sa odgovarajućim zakonskim propisima;
- k) “potvrda o ispunjenju mjeriteljskih i drugih uvjeta” je dokument koji izdaje Zavod za mjeriteljstvo Federacije Bosne i Hercegovine za mjerila koja se uvoze a za koja je obavezan mjeriteljski nadzor da bi se na osnovu takve potvrde mogao dozvoliti uvoz;
- l) “kalibracija” je skup postupaka kojima se u određenim uvjetima uspostavlja odnos između vrijednosti veličina koje pokazuje neko mjerilo ili vrijednosti koju predstavlja neki referentni materijal i odgovarajućih vrijednosti ostvarenih etalonom;

- m) "certifikat o kalibraciji" je dokument u koji se upisuju i potvrđuju rezultati kalibracije;
- n) "verifikacija mjerila ili referentnih materijala" je niz postupaka kojima se utvrđuje da li mjerilo ili referentni materijal ispunjava propisane mjeriteljske zahtjeve, uključuje pregled mjerila i otiskivanje žiga a može biti: prvo, naredno i vanredno;
- o) "certifikat o verifikaciji" je dokument kojim se potvrđuje da je izvršena verifikacija uz navođenje rezultata pregleda mjerila i u kome se mogu dati upute i rokovi za narednu verifikaciju;
- p) "rok verifikacije" je propisani vremenski razmak između uzastopnih verifikacija u cilju osiguranja propisane nesigurnosti mjerenja mjerila;
- r) "kontrola predmeta od plemenitih metala" je skup postupaka koji se provode sa zadatkom utvrđivanja i potvrđivanja žigom zadovoljavanja zakonskih propisa za takve predmete;
- s) "otiskivanje žiga" je skup postupaka kojim se na propisani način i na propisano mjesto na mjerilo otiskuje žig ili oznaka koja odgovara žigu;
- t) "verifikacioni žig" je oznaka koja se otiskuje na mjerilo da bi se verifikovala ispravnost mjerila i/ili spriječilo odvajanje, pomicanje, izmjena ili zamjena pojedinih sastavnih elemenata mjerila;
- u) "pretpakirani proizvodi" su proizvodi u bilo kakvoj ambalaži koji su pakovani i zatvoreni bez prisustva kupca a čiju količinu nije moguće mijenjati bez otvaranja i oštećenja ambalaže.

Član 5.

Stručne i organizacione poslove iz oblasti zakonskog mjeriteljstva u Federaciji obavlja Zavod za mjeriteljstvo Federacije Bosne i Hercegovine (u daljnjem tekstu: Zavod) u saradnji i koordinaciji sa Institutom za standarde, mjeriteljstvo i intelektualno vlasništvo Bosne i Hercegovine (u daljnjem tekstu: Institut) i Savjetom za mjeriteljstvo Bosne i Hercegovine (u daljnjem tekstu: Savjet).

Član 6.

Iz oblasti mjeriteljstva u Federaciji Zavod donosi: tehničke propise o verifikaciji mjerila; vrši ispitivanje i verifikaciju mjerila; izdaje potvrde o ispunjenju mjeriteljskih i drugih uvjeta za mjerila i certifikate o ispravnosti mjerila; učestvuje u ostvarivanju, čuvanju, održavanju i upotrebi etalona i referentnih materijala; vodi odgovarajuće registre na području Federacije; vrši mjeriteljski nadzor nad upotrebom mjerila i označavanjem pakiranih proizvoda; vrši neposrednu kontrolu predmeta od plemenitih metala i otiskivanje žiga na njih; saraduje sa odgovarajućim institucijama u Bosni i Hercegovini i obavlja druge poslove iz oblasti mjeriteljstva koji nisu u nadležnosti institucija Bosne i Hercegovine.

Za obavljanje poslova i ovlaštenja verifikacije mjerila, nadzora pretpakiranih proizvoda, neposredne kontrole predmeta od plemenitih metala i nadzora nad provođenjem zakonskih mjeriteljskih propisa u Federaciji, Zavod formira centre za verifikaciju i nadzor mjerila (u daljnjem tekstu: centri) čiji se broj i organizaciona struktura propisuju Pravilnikom o unutrašnjoj organizaciji Federalnog ministarstva energije, rudarstva i industrije.

Član 7.

Prilikom izvršavanja zadataka, poslova i ovlaštenja verifikacije i nadzora Zavod koristi referentne i radne etalone, uzorke referentnih materijala i opremu za verifikaciju koje upoređuje sa etalonima višeg ranga, koje čuva i održava Institut.

Etalone, referentne materijale i opremu za verifikaciju koje posjeduje Zavod kalibriše i verifikuje Institut u skladu sa međunarodnim mjeriteljskim preporukama i dokumentima.

Član 8.

Kalibraciju i verifikaciju etalona i opreme za verifikaciju iz člana 7. ovog Zakona vrši Institut na način i prema metodama koje propisuje direktor Instituta u formi mjeriteljskih uputstava.

Postupak osiguranja sljedivosti prema etalonima i/ili referentnim materijalima višeg mjeriteljskog kvaliteta ostvaruje se na način i prema metodama koje propisuje direktor Instituta u formi mjeriteljskih uputstava.

Član 9.

Pravna i fizička lica moraju posjedovati i koristiti mjerila koja su propisana za obavljanje njihove djelatnosti u skladu sa Zakonom o mjeriteljstvu Bosne i Hercegovine i ovim Zakonom.

U promet se mogu stavljati samo ona mjerila koja ispunjavaju zakonske, mjeriteljske i tehničke zahtjeve sadržane u odgovarajućim propisima i za koja je zahtjevana usklađenost po propisanim načinima i postupcima ocjenjivanja usklađenosti.

U promet se mogu pustiti samo ona mjerila koja posjeduju certifikat o usklađenosti ili certifikat o odobrenju tipa i koja su na propisan način označena.

Pod označenim mjerilom podrazumijeva se mjerilo koje na sebi može imati sljedeće oznake:

- a) oznaku usklađenosti za mjerila za koja nije obavezna verifikacija i za mjerila koja treba nakon ocjenjivanja usaglašenosti verifikovati;
- b) oznaku postojanja ili nepostojanja obaveze uvoznika/imaoca mjerila da ispita tip i/ili verifikuje mjerilo nakon izdavanja potvrde o uvozu;
- c) propisan žig verifikacije nakon izvršene verifikacije mjerila.

Direktor Instituta za pojedine vrste mjerila propisuje načine ocjenjivanja usklađenosti, vrste i načine označavanja mjerila, te sadržaj i oblik certifikata o usklađenosti sa mjeriteljskim propisima.

Član 12.

Mjerila koja se uvoze i za koja je obavezan mjeriteljski nadzor moraju imati potvrdu o ispunjavanju mjeriteljskih i drugih uvjeta izdatu od Zavoda.

Potvrda se može izdati ako je mjerilo prethodno prošlo proceduru ocjenjivanja usklađenosti te ima certifikat o usklađenosti ili odobrenje tipa izdat ili priznat od Instituta i za mjerila koja se prvi put uvoze.

Potvrdom se definiraju obaveze uvoznika ili imaoća mjerila prije puštanja u promet ili upotrebe navedenog mjerila (certifikovanje, odobrenje tipa, verifikacija ili bez obaveza). Ova potvrda služi za obavljanje carinskih poslova pri uvozu mjerila sa ciljem zaštite industrije, tržišta, zdravlja i sigurnosti industrije i potrošača od uvoza mjerila koja ne zadovoljavaju mjeriteljske i tehničke zahtjeve.

Zahtjev za izdavanje potvrde o ispunjavanju mjeriteljskih i drugih uvjeta podnosi uvoznik mjerila, odnosno zastupnik strane firme, a uz zahtjev se obavezno prilaže potrebna tehnička dokumentacija.

Zavod vodi registar izdatih potvrda o ispunjenju mjeriteljskih i drugih uvjeta kao javnu knjigu, te Institutu dostavlja popis izdatih potvrda.

Član 13.

Mjerila za koja je prema Zakonu o mjeriteljstvu Bosne i Hercegovine i ovom Zakonu obavezan mjeriteljski nadzor podliježu prvoj, narednoj i vanrednoj verifikaciji.

Verifikaciju mjerila, poštujući važeće tehničke propise, vrši Zavod i njegovi centri ili imenovana pravna lica koja su prethodno prošla proceduru akreditiranja ili proceduru jednako vrijednu akreditiranju.

Tehničke i druge propise o mjeriteljskim uvjetima za mjerila, o načinu pregleda i verifikacije mjerila i o izdavanju potvrda za ispunjenje mjeriteljskih uvjeta za uvoz mjerila donosi federalni ministar energije, rudarstva i industrije (u daljnjem tekstu: federalni ministar).

O ispravnosti mjerila koja se nalaze u upotrebi dužni su se brinuti vlasnici mjerila ili njihovi korisnici.

Član 15.

Narednoj verifikaciji podliježu mjerila koja se nalaze u upotrebi ili ona koja se čuvaju radi stavljanja u upotrebu ili promet.

Naredna verifikacija mjerila obavezno se vrši prije nego što istekne rok prethodne verifikacije.

Zahtjev za narednu verifikaciju podnosi vlasnik ili korisnik mjerila.

Naredna verifikacija mjerila vrši se u rokovima koje propiše direktor Instituta.

Mjerilo za koje je istekao rok važnosti verifikacije ne smije se upotrebljavati.

Član 17.

Vrste i oblike žigova koje upotrebljava Zavod i imenovana pravna lica u Federaciji za verifikaciju mjerila propisuje federalni ministar na prijedlog direktora Zavoda.

Žigovi koji se upotrebljavaju kod verifikacije mjerila prestaju da važe ako je:

- a) prestao rok važnosti prethodne verifikacije;
- b) žig promijenjen, oštećen ili uklonjen;
- c) žig poništen.

Prestankom važenja žiga prestaje da važi i certifikat o verifikaciji mjerila.

Član 21.

Nadzor nad količinama pretpakiranih proizvoda koji se nalaze u prometu ili tek treba da se stave u promet vrše ovlašteni djelatnici Zavoda, tržišna inspekcija odnosno pravno lice koje je imenovano od Instituta.

Pravna lica koja se bave pretpakiranjem proizvoda o svojoj djelatnosti moraju obavijestiti Zavod.

Član 23.

Nadzor nad provedbom ovog Zakona i propisa donesenih za njegovu provedbu vrše Zavod i tržišna inspekcija u okviru svojih ovlaštenja.

Član 24.

Nadzor nad imenovanim mjeriteljskim laboratorijama i pravnim licima imenovanim za nadzor vrši Institut, a direktor Instituta propisuje način mjeriteljskog nadzora nad mjeriteljskim laboratorijama i pravnim licima imenovanim za nadzor.

Direktor Instituta propisuje mjerila, etalone i referentne materijale nad kojima se vrši mjeriteljski nadzor, kao i način i sadržaj mjeriteljskog nadzora.

Član 26.

Provedbu ovog Zakona pri nadzoru: ima li mjerilo ispravan žig odnosno važeći certifikat o verifikaciji, jesu li valjani žigovi na predmetima od plemenitih metala u prometu ili koji će se tek staviti u promet, jesu li ispravni pretpakirani proizvodi i deklarirane količine vrši tržišna inspekcija.

Organi tržišne inspekcije rješenjem će zabraniti upotrebu i promet neverifikovanih i neispravnih mjerila, bez otisnutog žiga ili sa neodgovarajuće otisnutim žigom predmeta od plemenitih metala i neispravnih ili neispravno deklariranih pretpakiranih proizvoda.

Organi tržišne inspekcije primjerak rješenja iz stava 2. ovog člana dužni su dostaviti Zavodu.

Član 27.

Djelatnici Zavoda ovlašteni za nadzor imaju službenu legitimaciju koju izdaje i ovjerava direktor Zavoda.

Sadržaj i oblik službenih legitimacija i način izdavanja i vođenja evidencija o službenim legitimacijama propisuje federalni ministar.

Član 32.

Novčanom kaznom u iznosu od 2.000,00 KM do 20.000,00 KM kaznit će se za privredni prijestup pravno lice ako:

- a) upotrebljava mjerilo koje rezultate mjerenja ne izražava u mjernim jedinicama propisanim zakonom (član 3.);
- b) upotrebljava mjerilo za koje nije izdat certifikat o ocjenjivanju usklađenosti ili je ukinut certifikat o usklađenosti mjerila (član 9. stav 3.);
- c) stavi u promet ili upotrebljava mjerilo iz uvoza za koje nije pribavljena potvrda Zavoda da ispunjava mjeriteljske i druge uvjete (član 12. stav 1.);
- d) stavi u promet ili upotrebljava mjerilo koje nije na propisan način verifikovano (član 13. stav 2.).

Za privredni prijestup iz stava 1. ovog člana novčanom kaznom u iznosu od 120,00 KM do 1.200,00 KM kaznit će se i odgovorno lice u pravnom licu.

Član 33.

Novčanom kaznom u iznosu od 600,00 KM do 2.000,00 KM kaznit će se za prekršaj pravno lice ako:

- a) ne vrši prvu, narednu ili vanrednu verifikaciju mjerila (član 13. stav 1.);
- b) upotrebljava mjerilo kojem je istekao propisani rok periodične verifikacije (član 15. stav 5.);
- c) stavi u promet pretpakirani proizvod bez oznake količine ili ako stvarna količina nije u okviru dozvoljenih odstupanja od naznačene količine (član 20. stav 2.).

Za prekršaj iz stava 1. ovog člana novčanom kaznom u iznosu od 200,00 KM do 500,00 KM kaznit će se fizičko lice i odgovorno lice u pravnom licu.

Član 34.

Novčanom kaznom u iznosu od 250,00 KM do 600,00 KM kaznit će se za prekršaj pravno lice ako:

- a) uopće ne posjeduje mjerilo propisano za obavljanje djelatnosti (član 9. stav 1.);
- b) upotrebljava neispravno mjerilo ili ga upotrebljava na način kojim se ne osigurava potrebna tačnost mjerenja (član 25. stav 2.);
- c) ne obavijesti Zavod o djelatnosti pretpakiranja (član 21. stav 2.);
- d) ne omogući nesmetan nadzor ili ne da podatke potrebne za vršenje nadzora (član 28. stav 2.).

Za prekršaj iz stava 1. ovog člana novčanom kaznom u iznosu od 50,00 KM do 100,00 KM kaznit će se fizičko lice i odgovorno lice u pravnom licu.

Za ponovljene prekršaje iz čl. 32. i 33. ovog Zakona može se izreći i zaštitna mjera trajnog oduzimanja mjerila čijom je upotrebom počinjen prekršaj, a pored toga, može se izreći i zaštitna mjera trajne ili privremene zabrane obavljanja djelatnosti u trajanju od šest mjeseci.